



Memoria

Equipo de Actividades Complementarias e Extraescolares

CURSO 2022-2023



Datos xerais:

Inicio do proxecto: A primeira reunión para a constitución do equipo foi o 7 de setembro de 2022.

Aulas e cursos implicados: Todas as aulas e todos os cursos do centro educativo. As actividades organizadas polo Equipo de Actividades Complementarias e Extraescolares (EACE) estiveron dirixidas a todo o alumnado das diferentes etapas. O equipo estivo composto por membros de Educación Infantil, Educación Primaria e Educación Secundaria que traballamos, conxuntamente, na posta en marcha e funcionamento deste tipo de actividades. Polo tanto, en maior ou menor medida, todo o alumnado e todo o profesorado participou e colaborou co EACE.

Compoñentes do equipo:

Mónica Ares Ameixide
Carlos Bacelo López
Juan Coira Pociña
Daniel Díaz Viqueira
Beatriz Fernández Rey
Dolores Freire Villar
Guillermo Gómez Iglesias
Alicia González Alonso
Alba López Brañas
Lidia López Sandomingo
Zaida Patiño Palleiro
Marina Pernas Marín
María Luísa Pita Rubido (coordinadora)
Vanessa Pita Santalla
María Dolores Otero Mariñas
Antonio Rodríguez Rodríguez
Tania Ruanova Suárez

Introdución:

Este curso escolar 2022-2023, ao igual que en anos anteriores, o **Equipo de Actividades Complementarias e Extraescolares** tivo como finalidade e obxectivo planificar e organizar as diferentes actividades complementarias e extraescolares do centro que se levaron a cabo durante todo o curso, en estreita colaboración co resto de equipos e dinamizacións, principalmente co **Equipo de Dinamización da Lingua Galega** e co **Equipo da Biblioteca**.

Periodicamente, realizáronse reunións cos membros destes equipos de cara a organizar e propoñer as diferentes actividades, moitas das cales xiraron arredor das conmemoracións e efemérides anuais habituais. Tamén se colaborou na organización e no desenvolvemento do proxecto anual de centro, que cada curso fai referencia a unha temática diferente escollida por todo o profesorado.

Distribuídas por trimestres, relacionamos a continuación as actividades complementarias e extraescolares que se desenvolveron ao longo deste curso no CPI Atios:



Actividades que se desenvolveron ao longo de todos os trimestres:

Proxecto anual do centro

Durante este curso, o proxecto anual de centro xirou arredor do 50 aniversario do CPI de Atios (antes, colexio de EXB). Para xestionar de maneira máis adecuada todo o traballo que implicou dita conmemoración, creáronse unhas comisións que se encargaron de levar a cabo distintos aspectos do proxecto. Estas comisións estiveron compostas por diferentes membros da comunidade educativa: persoal docente e non docente, familias e alumnado. A comisión museística, encargada de recopilar, a través dos traballos do alumnado e doutras fontes, testemuños e materiais que formaron parte do centro ao longo da súa historia, inaugurou unha exposición o 12 de maio con todas esas achegas, exposición que puido visitarse na Casa da Cultura de Valdoviño durante varias semanas. A comisión TICS encargouse de deixar constancia do labor realizado a través da recollida audiovisual de todos os actos e eventos que tiveron lugar, así como da elaboración dun documental final que resumiu todo este traballo. E, xa por último, a comisión económica e de festexos realizou o labor de xestionar a venda de camisetas, cuncas, toallas, bolsas, rifas e entradas para a cea baile, así como de organizar a propia cea baile, e deste xeito recadar o diñeiro necesario para desenvolver a festa de final de curso, que tamén se encargou de planificar. Sen dúbida, este inxente proxecto implicou non só a actual comunidade educativa do CPI de Atios, senón tamén a toda a poboación do concello que, na inmensa maioría, tivo algún tipo de relación co centro ao longo destas cinco décadas.

Bo día, Atios!

Ao igual que no anterior, durante este terceiro trimestre amenizouse a entrada á escola con música “picada” dende a Conserxería, aceptando as propostas do alumnado pero dando prioridade á música en galego.

Actividades realizadas no primeiro trimestre:

Festival de títeres “Entes animados”

Dende a Concellería de Cultura do Concello de Valdoviño, trasladouse a proposta de participar como espectadores neste festival, concretamente na representación dunha das obras de títeres que se desenvolveu na Casa da Cultura de Valdoviño o 23 de setembro e que se titulaba “Pendente dun fío”.

Exposición de música galega “Cantámola nós”

Tamén a través do Concello de Valdoviño, neste caso dende o Servizo de Normalización Lingüística da Mancomunidade de Concellos de Ferrolterra, puidemos gozar da exposición de carteis informativos sobre os diferentes artistas e bandas do actual panorama musical galego e en galego. Dita exposición estivo no centro dende o 26 ao 30 de setembro e incluíu, ademais, a actuación da cantante e música MJ Pérez, que tivo lugar na Casa da Cultura de Valdoviño o 22 de setembro.

Espectáculo de maxia

Dende a Concellería de Cultura do Concello de Valdoviño propúxosenos un espectáculo de maxia para o alumnado de EP que tivo lugar na Casa da Cultura de Valdoviño o 13 de outubro.

Magosto e Samaín

O xoves 27 de outubro celebráronse simultaneamente o Magosto e o Samaín, e colaborouse na organización das distintas actividades propostas polo EDLG. Xa nos días previos, todas as portas das distintas aulas do colexio foron decoradas polo alumnado con motivos terroríficos relativos ao Samaín. Levouse tamén a cabo a tradicional exposición de cabazas, centros de outono e colares de zonzos aínda que, este ano, a diferenza dos anteriores, non houbo fase de concurso. Ademais, dende o Equipo da Biblioteca, organizouse un concurso de pesadelos consistente en elaborar un microrrelato de terror nunha cartolina que debía depositarse na caixa colocada para tal efecto na propia biblioteca.

O propio día da celebración desenvolveuse unha xincana que tivo como protagonista ao alumnado de EP. Organizouse de xeito que unha das probas da xincana implicase visitar os baños do terror. Se en cursos anteriores se habilitara unha aula do terror, unha sala de profes do terror e unha casa do conserxe do terror, este ano a localización foi nos baños do patio, que se atopan ao logo dun estreito e longo corredor moi axeitado para tal evento. Os alumnos e as alumnas do centro participaron elaborando elementos decorativos, aínda que o resultado final foi unha sorpresa para todos e todas. A rapazada de 4º da ESO organizou a decoración e a posta en escena da ambientación terrorífica con axuda do profesorado, especialmente da profesora de Plástica da ESO. Preparáronse distintos espazos con diferentes “graos de medo”, para que os/as máis pequeniños/as puidesen visitar os baños do terror sen problema, se así o desexaban.

E, na parte relacionada co Magosto, non faltou tampouco a degustación de castañas e chourizos, acompañados de zume, coa colaboración do comedor e da ANPA tanto na adquisición dos produtos como no reparto dos mesmos. Durante ese tempo, ademais, o conserxe asou un número simbólico de castañas ao xeito tradicional, rememorando como se facía antigamente e entroncando así a festividade coa celebración do 50 aniversario do centro.

Concertos didácticos

A través do Concello de Valdoviño, desenvolvéronse varios espectáculos musicais e de canto para os diferentes niveis educativos. Tiveron lugar na Casa da Cultura de Valdoviño ao longo do mes de novembro. O día 21, Magín Blanco e A banda das apertas para EI e 1º ciclo de EP; o día 23, Píscore, para o resto de cursos de EP, e o 24 de novembro, Ludus Tonalis, para a ESO.

Día contra a Violencia de Xénero

O EDLG elaborou unha batería de recursos para poder utilizar nas aulas durante os días próximos ao 25 de novembro e o Equipo da Biblioteca organizou un recitado de poemas e de cancións para o propio día da conmemoración. Ademais, contamos no centro coa exposición da Secretaría Xeral de Igualdade da Xunta de Galicia, “Cartas de Amor”, que está composta por ilustracións de varios debuxantes e que ten como finalidade visibilizar comportamentos machistas que se poden dar nas relacións de parella. Tamén a través da Xunta, o alumnado da ESO puido asistir a unha serie de charlas sobre o tema que tiveron lugar na Casa da Cultura de Valdoviño.

A nivel de aula, en Xeografía e Historia da ESO traballouse a violencia de xénero a través das obras de arte, en Plástica da ESO elaborouse un mural que se expuxo no centro, en 3º de EP investigouse sobre a orixe da conmemoración e sobre a biografía de varias mulleres ás que se lles dedicou o día na súa creación, e en EI realizouse unha instalación baseada nunha obra de Graciela Sacco.

Ademais, o propio 25 de novembro, celebrouse un acto no ximnasio do colexio que comezou ás 12 da mañá cun minuto de silencio e que continuou cunha “performance” na que varias alumnas leron poemas e cancións mentres outras ían caendo no chan pouco a pouco, representando a todas as mulleres asasinadas no ano 2022 ata ese momento.

A continuación, os seus compañeiros trazaron a súa silueta con xiz no chan. Para finalizar o acto, dous alumnos cantaron un rap composto por eles abordando a temática da violencia de xénero.

Festival de Nadal

Para o tradicional concurso de postais de Nadal, colocáronse os traballos do alumnado nos cortizos próximos a cada aula, de xeito que o último día de clase o xurado pasou polos corredores para valorar e seleccionar as postais gañadoras. Os diplomas e agasallos serán entregados á volta das vacacións.

O último día de clase antes das vacacións, o xoves 22 de decembro, tivo lugar o tradicional festival de Nadal que levaba xa dous anos sen celebrarse deste xeito a causa da pandemia da COVID. Novamente puidemos reunirmos alumnado e profesorado de todos os niveis educativos no ximnasio do centro para gozar das actuacións preparadas pola rapazada do colexio. Ademais, puideron asistir de novo como público as familias que así o desexasen, e a xornada resultou un éxito, tanto pola calidade do festival como pola afluencia de xente. Encargouse da presentación o alumnado de 4º ESO e, ademais da presenza do Apalpador e dos Reis Magos, houbo bailes, cancións, recreación de anuncios publicitarios antigos, entrega de premios do concurso de relatos de medo da biblioteca e sorteo de cestas de Nadal para colaborar coa excursión de fin de estudos dos maiores do centro. Pola tarde, para o alumnado da ESO, houbo unha festa de “fin de ano” organizada polo alumnado de 4º ESO para recadar cartos para a excursión. Dita festa consistiu nun baile con música e karaoke, badaladas con uvas e incluso elección do rei e da raíña do baile, tanto na categoría de alumnado como na de profesorado.

Paralelamente ás actividades complementarias organizadas a nivel de centro, os/as coordinadores/as e xefes/as dos diferentes ciclos e departamentos organizaron unha serie de excursións, saídas e actividades de grupo, que foron as seguintes durante este trimestre:

- En EI, o alumnado asistiu ao espectáculo de títeres “Entes animados” na Casa da Cultura de Valdoviño, actividade que tivo lugar o 23 de setembro. Ademais, tamén na Casa da Cultura e organizado a través da materia de Música, participou como espectador da actuación musical de Magín Blanco e A banda das apertas, o 21 de novembro. Ao longo do trimestre, realizáronse saídas á contorna coa finalidade de explorar os cambios producidos na natureza coa chegada do outono.
- No 1º ciclo de EP, o alumnado asistiu tamén ao festival de títeres “Entes animados” o 23 de setembro na Casa da Cultura de Valdoviño. O 11 de novembro realizou unha saída pola contorna da lagoa da Frouxeira, e o 21 de novembro, Día da Música, participou como espectador no concerto de Magín Blanco e a Banda das Apertas na Casa da Cultura de Valdoviño.
- No 2º ciclo de EP, o alumnado asistiu ao espectáculo musical celebrado na Casa da Cultura de Valdoviño o 23 de novembro a cargo do grupo Píscore, proposto polo concello e organizado a través da materia de Música. 3º de EP realizou unha saída ao Museo Etnográfico da Capela o 5 de decembro. Ademais, na materia de Educación Física, 4º de EP participou en varias sesións de tenis de mesa impartidas polo Club de Tenis de Mesa de Narón ao longo dos meses de novembro e decembro. A través da materia de ITI, desenvolvéronse as “merendas saudables” nos recreos.
- No 3º ciclo de EP, 6ª de EP realizou unha saída a Meteogalicia, o Museo de Historia Natural e a Catedral de Santiago. O 23 de novembro asistiu ao concerto didáctico celebrado na Casa da Cultura de Valdoviño a cargo de Píscore. Ademais, na materia de Educación Física, tanto 5º coma 6º de EP participou en varias sesións de tenis de mesa impartidas polo Club de Tenis de Mesa de Narón ao longo dos meses de novembro e decembro. A través da materia de ITI, desenvolvéronse as “merendas saudables” nos recreos.



- En canto á ESO, realizáronse as seguintes saídas e actividades:
 - O Departamento de Bioloxía organizou unha visita á Lagoa da Frouxeira que estivo guiada por membros da Sociedade Galega de Historia Natural, realizando un estudo da dinámica da lagoa e a observación de aves. Levouse a cabo o 1 de decembro e estivo dirixido ao alumnado de 1º de ESO.
 - O Departamento de Educación Física organizou unha charla da escola de surf Friends and Family para 1º de ESO o 3 de novembro.
 - O Departamento de Física e Química organizou unha charla a cargo dunha antiga alumna do centro que está actualmente a elaborar a súa tese de doutoramento en física nuclear. Esta actividade tivo lugar o 28 de novembro e estivo dirixida a 2º, 3º e 4º de ESO. Ademais, tamén puxo en marcha un club de lectura científica que se desenvolveu nos primeiros recreos dos martes e que estivo dirixido a toda a ESO. En canto ás saídas, o venres 16 de decembro, co obxectivo de coñecer como se prepara a auga para o seu consumo e o saneamento para a súa chegada ao mar, o alumnado de 4º de ESO visitou o encoro de As Forcadas e a planta potabilizadora (ETAP) de Catabois, a partir da cal se distribúe ás nosas casas. Tamén visitou a Estación de Bombeo máis grande de Europa (EBAR) situada na Cabana e, por último, a Estación de Depuración de Augas Residuais (EDAR) de Prioriño, onde se trata a auga para a súa vertedura ao mar dun xeito máis adecuado. Previamente a esta saída, o xoves 15, acudiu ao centro a dar unha charla o director xerente de EMAFESA, empresa titular da traída da auga de Ferrol.
 - O Departamento de Lingua Castelá realizou unha saída ao colexio La Salle de Santiago de Compostela para ver a obra de teatro *El asesinato del profesor de Matemáticas*. Tivo lugar o 21 de novembro para o alumnado de 1º e 2º de ESO.
 - O Departamento de Xeografía e Historia participou na materia de Economía de 4º ESO no concurso sobre comercio local “i-Comercio” promovido pola Dirección Xeral de Comercio e Consumo da Xunta de Galicia.
 - O Departamento de Música participou na organización do concerto que tivo lugar o 24 de novembro a cargo do coro Ludus Tonalis.

Actividades realizadas no segundo trimestre:

Día da Paz

Co gallo de celebrar o Día da Paz, creáronse unha serie de tapices a modo de tear feitos a partir de anacos de sabas vellas nos que, posteriormente, se colocaron mensaxes e imaxes relacionadas coa paz e a non violencia. Tamén se traballou esta conmemoración nas aulas e nas titorías a través de distintas actividades e materiais, aínda que este curso non houbo ningún acto concreto a maiores destes traballos realizados ao redor do día 30 de xaneiro.

Teatro con G

O alumnado de 6ºA de EP está a preparar a obra “Rosíña a xordiña” para participar no festival Teatro con G organizado pola Coordinadora de Equipas de Normalización Lingüística de Ferrolterra e leva cos ensaios xa dende comezo deste 2º trimestre.



Día do Amor e da Amizade

Durante as semanas previas ao 14 de febreiro, toda a comunidade educativa se implicou na escrita de mensaxes de amor e amizade para depositar nas diferentes caixas de correo distribuídas polo centro. Nesta actividade, organizada polo EDLG, colaborou tamén o alumnado da ESO organizando o correo e repartindo as cartas ás persoas destinatarias.

A maiores, e en relación co 50 aniversario do centro, o EDLG elaborou tamén unha porra consistente en adiviñar a identidade de varios “querubíns” pequeniños creados a partir de fotografías da infancia do profesorado e doutro persoal adulto do centro. Publicouse na web a orla con estas fotografías e as persoas que quixesen participar debían adquirir unha papeleta cos nomes dos/as retratados/as para asignarlles o número de imaxe correspondente. A actividade, que se fixo este curso por primeira vez, tivo un grande éxito e un bo número de persoas participantes.

Entroido

Ademais de cumprir os mandados do Meco durante a semana do festival, mandados que consistían en traer cada día un complemento concreto e rechamante na nosa indumentaria (este ano en relación, ademais, con Día do Amor e a Amizade, por coincidir no tempo), o Entroido xirou, como cada ano, arredor do proxecto do centro. Os/as alumnos/as de cada grupo ou curso, ao igual que o resto da comunidade educativa, disfrazáronse de personaxes típicos das series ou do mundo da música dos anos 70, década na que o centro educativo comezou a súa andaina.

Xa o día anterior ao festival, o xoves 16 de febreiro, o alumnado de 4º da ESO organizou unha festa de disfraces para recadar cartos para a excursión de fin de estudos. Nesta festa escolléronse os disfraces gañadores, ademais de haber música, petiscos e un *photocall* para retratarse lucindo os disfraces de Entroido.

O venres 17 de febreiro tivo lugar, grazas a que o tempo o permitiu, o tradicional pasarrúas pola vila, rematando o percorrido cun festival de comparsas e bailes no exterior da Casa da Cultura de Valdoviño. Unha vez de volta no centro, alumnado e profesorado puideron degustar distintas sobremesas de Entroido, algunhas delas achegadas polas familias.

Día de Rosalía

Para conmemorar o Día de Rosalía de Castro, que tivo lugar o 23 de febreiro (nova data establecida para o seu nacemento, segundo as últimas investigacións), todo o centro traballou arredor da súa figura e obra de diferentes xeitos e en diferentes clases. Para isto, dende o EDLG propúxose unha batería de actividades consistentes en tarefas de lingua, *escape rooms*, xogos...

Dende Cultura do Concello de Valdoviño ofrecéronnos un espectáculo teatral dirixido ao alumnado dende 3º de EP ata 4º da ESO titulado *Sempre Rosalía*, que tivo lugar o 24 de febreiro na Casa da Cultura, e que xiraba arredor da imaxe parcial atribuída a Rosalía ao longo da historia.

Outra interesante actividade foi a proposta dende a Biblioteca, que consistiu en elaborar unha Rosalía de Castro xigante cun vestido feito a partir de flores e tiras de papel decoradas con palabras e versos da autora. Este mural con forma de escritora colocouse nunha das entradas do centro, na zona da Conserxería e da radio.

Poesía e Imaxe

Como cada ano, o noso alumnado participou no concurso, establecido para todos os niveis educativos, organizado pola Coordinadora de Equipas de Normalización Lingüística de Ferrolterra, e que consiste na creación de



obras artísticas a partir de poemas de diferentes linguas seleccionados de antemán pola propia Coordinadora. Para iso, o alumnado traballou os textos e a súa representación gráfica na materia de Plástica.

Día da Muller

Para conmemorar o 8 de marzo, o alumnado realizou unha serie de actividades ao longo das semanas próximas á data co fin de visibilizar a desigualdade aínda existente na sociedade por razóns de xénero. Moitas delas fixéronse a través de distintas materias ou das titorías.

Ademais, ese mesmo día, o alumnado da ESO asistiu a un espectáculo de teatro ofrecido pola Casa da Cultura do Concello de Valdoviño. Dito espectáculo, #2Pilgrims, da compañía Redrum Teatro, aborda o tema da igualdade de xénero e as novas masculinidades.

A Mocidade coa Lingua

Este curso volveu celebrarse o xa tradicional festival da Mocidade coa Lingua que todos os anos organiza a Coordinadora de Equipas de Normalización Lingüística de Ferrolterra e que esta edición fixo o seu 30 aniversario. Neste festival participan grupos musicais de alumnos/as de toda a comarca de Ferrolterra e tamén un grupo profesional que pecha o espectáculo e que, nesta ocasión, foi Fillas de Cassandra.

Durante os meses previos, un grupo de alumnos e alumnas de varios cursos da ESO do centro ensaiou dúas pezas para participar no evento. Este alumnado, que formou para a ocasión o grupo Bandoviño, compuxo dous temas, un deles unha versión musicada do poema de Manuel María “Agora, que gastei os meus outonos” e outro de autoría propia, “Collendo impulso”, como indicaban as bases do festival.

Paralelamente ás actividades complementarias organizadas a nivel de centro, os/as coordinadores/as e xefes/as dos diferentes ciclos e departamentos organizaron unha serie de excursións, saídas e actividades de grupo, que foron as seguintes durante este trimestre:

- No 1º ciclo de EP, realizouse unha saída o 26 de xaneiro á Coruña para visitar o Muncyt e o Aquarium, asistindo tanto 1º como 2º. Ademais, os grupos de 2º de EP saíron pola contorna e visitaron a Casa do Concello.
- No 2º ciclo de EP, o alumnado de 4º de EP fixo dúas saídas, unha o día 28 de abril ao longo da mañá, andando ata a praia da Frouxeira, para traballar con Fran Canosa temas de rochas. A outra saída foi o 2 de marzo e nela os rapaces e rapazas visitaron a Domus e o Muncyt na Coruña, para traballar temas de electricidade e observar diversos aparellos relacionados coas ciencias naturais e sociais, ademais da paisaxe.
- No 3º ciclo de EP, o alumnado de 5º e 6º de EP participou no FELG (Foro Escolar Literario Galego) realizado en varias sesións na Biblioteca Municipal de Valdoviño, coordinado por Antón Cortizas e coa presenza de Antonio Yañez Casal, autor do libro *A complicada vida de Bieito Viqueira*, e de M.A. Alonso Diz, autor da obra *O país da choiva*.

Por outra banda, 6ª de EP visitou o museo etnográfico e a antiga escola da Capela o 31 de xaneiro. Ademais, o 15 febreiro, realizou unha saída a Campo a Través en Cedeira. Tamén asistiu como público ao espectáculo *Sempre Rosalía* que tivo lugar na Casa da Cultura o 24 de febreiro e participou no obradoiro “Fai click ao teu bocata” que se desenvolveu no comedor escolar o 16 de marzo.

- En canto á ESO, realizáronse as seguintes saídas e actividades:
 - O Departamento de Bioloxía organizou unha visita guiada á lagoa da Frouxeira con membros da Sociedade Galega de Historia Natural. O obxectivo da visita foi recibir *in situ* unha explicación sobre a dinámica hídrica da lagoa e a observación de aves. Dita visita tivo lugar o 2 de febreiro para 4º de ESO.
 - O Departamento de Educación Física organizou unha semana branca para o alumnado de 2º, 3º e 4º de ESO que tivo lugar dende o sábado 18 de marzo ata o venres 24 de marzo en Andorra.
 - O Departamento de Lingua Castelá realizou unha saída ao colexio La Salle de Santiago de Compostela para ver a obra de teatro *El Lazarillo*. Tivo lugar o 31 de xaneiro para o alumnado de 3º e 4º de ESO.
 - O Departamento de Xeografía e Historia organizou un obradoiro de Prehistoria que tivo lugar o martes 21 de marzo co alumnado de 1º de ESO.

Actividades realizadas no terceiro trimestre:

Foro Literario do Concello de Valdoviño

O 20 de abril e o 16 de maio tiveron lugar na Biblioteca Municipal do Concello de Valdoviño as dúas sesións do foro literario dirixido por Antón Cortizas ao que asistiu, de xeito voluntario, parte do alumnado de 1º de ESO. Nos trimestres anteriores o foro estivo dirixido aos rapaces e rapazas de EP. Nesta ocasión, a lectura que tiveron que realizar e que despois comentaron coa súa autora foi *Camiño perigoso*, de Ánxela Loureiro.

Día do Libro

Ademais das actividades propostas pola Biblioteca, o EDLG e o EACE, seguindo coa tradición de poñer en contacto o alumnado con escritores/as de Valdoviño, organizaron un encontro con Rosa Aneiros que, en lugar de realizarse próximo á data oficial, o 23 de abril, trasladouse á data de celebración das Letras Galegas por cuestións de axenda da propia escritora e aproveitando, tamén, para enlazar a súa visita coa conmemoración do 50 aniversario do centro, xa que foi alumna do colexio.

Sesión de contacontos do Concello de Valdoviño

A través de Cultura do Concello de Valdoviño, o alumnado do 1º ciclo de EP puido asistir a unha sesión de contacontos do camerunés Boniface Ofogo, que tivo lugar no auditorio da Casa da Cultura o 5 de maio.

Maios

Este curso a celebración dos Maíos adiantouse a comezos de mes, tendo lugar o día 5 de maio e realizándose, a diferenza dos cursos anteriores, separado das Letras Galegas. Elaborouse a tradicional alfombra floral no patio da cafetería xa dende o día previo, encargándose do deseño a profesora de Plástica da ESO e colaborando profesorado e alumnado na preparación tanto do debuxo como das flores. Os diferentes cursos de todos os niveis fixeron tamén os seus “minimaíos” para colocar arredor da alfombra e o alumnado de 4º ESO confeccionou uns maíos grandes para situar no centro durante a celebración. Ademais, tampouco faltou a música: cantáronse as tradicionais cancións dos Maíos, que foron ensaiadas previamente pola profesora de Música de EP, e o profesor de Historia da ESO ofreceu un pequeno concerto de gaita xunto a unha alumna de 4º de ESO.

Día das Letras Galegas

Durante os días próximos ao 17 de maio traballouse nas aulas e, máis concretamente na materia de Lingua Galega e Literatura, o autor homenaxeado este ano, Francisco Fernández del Riego, ao cal lle debemos, entre outras cousas, que exista esta importante conmemoración. Organizouse un concurso de investigación a partir dos carteis enviados pola Secretaría Xeral de Política Lingüística de xeito que o alumnado, por grupos, tivo que buscar información sobre o autor a partir dunhas preguntas previamente formuladas na clase. Tamén se visualizaron na aula outros materiais elaborados para a ocasión, como algún vídeo sobre a vida e a obra do autor. O EDLG puxo a disposición do profesorado todos aqueles recursos e materiais que foron xurdindo sobre Fernández del Riego para poder traballalo nas aulas de todos os niveis educativos.

Na conmemoración que tivo lugar no centro o día 19 de maio realizáronse numerosas actividades ao longo da mañá. O feito de non facer coincidir esta celebración coa dos Maíos, a diferenza de cursos anteriores, foi moi positivo, xa que se lle deu o protagonismo que merecía ao Día das Letras, o cal do outro xeito quedaba en segundo plano a causa da grande importancia que ten a tradición dos Maíos no noso centro. As actividades concretas que se desenvolveron foron as seguintes:

Como inicio da celebración, alumnado de 4º de ESO leu un manifesto arredor da importancia desta data e da figura de Fernández del Riego e o grupo musical Bandoviño interpretou os temas musicais que preparara a raíz da súa participación no festival A Mocidade coa Lingua, da Coordinadora de Equipas de Normalización Lingüística de Ferrolterra. A este acto asistiu todo o alumnado do colexio e tivo lugar no patio.

Posteriormente, na Biblioteca, Rosa Aneiros conversou co alumnado de EP, mentres o alumnado de ESO asistiu no auditorio da Casa da Cultura de Valdoviño a un obradoiro de instrumentos musicais tradicionais, onde tamén actuaron o profesor de Historia de ESO e a alumna de 4º, interpretando varias cancións coa gaita.

Finalmente, tamén na Casa da Cultura, Rosa Aneiros respondeu as preguntas do alumnado da ESO e faloulles aos rapaces e ás rapazas non só de literatura, senón tamén da súa experiencia persoal como alumna do noso centro.

Cea baile 50 aniversario

A comisión económica e de festexos do 50 aniversario encargouse de organizar unha gran cea baile o 27 de maio na pista da Asociación de Veciños de Lago. A ela asistiron todas as persoas que así o desexaron, a maioría vinculadas ao ATios nalgún momento da súa historia, ben fose como alumnos/as, como profesores/as, como familiares... Antes e despois da cea houbo actuacións musicais a cargo de Bitter Cans, Ollo ao chanzo (estes dous grupos con membros vinculados ao centro), Nuevo Plan e un disk-jockey que puxo o colofón á festa.

Charla da Confraría de Pescadores de Cedeira

A Confraría de Pescadores de Cedeira ofreceu unhas charlas para alumnado de EP e de ESO arredor do tema dos residuos e da limpeza das costas, nas que tamén participaron mariscadoras de Valdoviño. Tivo lugar o 31 de maio no auditorio da Casa da Cultura de Valdoviño.

Intercambios epistolares con alumnado de Cospeito e da Coruña

O EDLG e o Departamento de Lingua Galega levaron a cabo dous intercambios epistolares con alumnado doutros centros educativos. No caso do intercambio co IES Ramón Menéndez Pidal (Zalaeta), este limitouse á correspondencia entre os rapaces e rapazas de 1º de ESO dos dous centros, mais no caso do CPI Virxe do Monte, ademais do intercambio de misivas, realizáronse dous encontros entre o alumnado de 3º de ESO: un primeiro no que o alumnado de Valdoviño visitou Cospeito e outro no que o alumnado de Cospeito visitou Valdoviño, o 2 e o 5 de xuño, respectivamente. A finalidade, neste caso, era poñer en contacto os nosos rapaces e rapazas cunha realidade sociolingüística diferente á súa, na que o galego é a lingua de relación normal e habitual entre a mocidade.

Teatro con G

O alumnado de 6º de EP preparou unhas obras de teatro (unha por clase) para participar no festival Teatro con G organizado pola Coordinadora de Equipas de Normalización Lingüística de Ferrolterra, que tivo lugar o 6 de xuño no teatro Jofre de Ferrol. O alumnado de 5º de EP asistiu ese día como público e, previamente, os 6ºs representaron as súas obras para os compañeiros e compañeiras de 1º a 4º de EP no auditorio da Casa da Cultura de Valdoviño.

Certame de microrrelato e micropoesía “Carmela Loureiro”

Aínda que a elaboración dos microrrelatos e micropoemas do alumnado xa tivo lugar con antelación nas clases de Lingua Galega e Literatura, o fallo do concurso organizado pola Coordinadora de Equipas de Normalización Lingüística de Ferrolterra e o Concello de Ferrol a nivel comarcal non se soubo ata o mes de xuño. Do noso centro resultaron gañadores de 1º premio en diferentes categorías unha alumna de 2º de ESO e un alumno de 4º de ESO. Ademais, tamén recibiron un accésit unha alumna de 6º de EP e un alumno de 1º de ESO. A entrega de premios tivo lugar na capela do Torrente Ballester o 21 de xuño.

Fin de curso

A fin de curso celebrouse por todo o alto grazas aos cartos recadados pola comisión económica e de festexos do 50 aniversario, de xeito que o alumnado, especialmente o de EI e EP, contou con todo tipo de actividades en función da súa idade: inchables, festa infantil a cargo da Gua-gua, música en directo de Pablo Díaz, karaoke, xincanas de xogos, disk-jókeys, festa da escuma... Pero sen esquecer as actuacións do alumnado de ESO, tanto musicais como de baile, e a despedida do alumnado de 4º de ESO que finalizaba a súa etapa educativa no CPI Atios. Ademais, organizouse un xantar “campestre” no patio e nas pistas, onde toda a comunidade educativa puido gozar de bocadillos de tortilla elaborados dende o comedor, empanada e polos xeados.

Acto de graduación do alumnado de 4º de ESO

O alumnado e as titoras de 4º de ESO organizaron, por vez primeira no centro, un acto de graduación que tivo lugar o 26 de xuño no auditorio da Casa da Cultura de Valdoviño, e ao que asistiron tanto o profesorado como as familias. Ademais dos emotivos discursos a cargo de alumnado e titoras, tamén se procedeu á entrega das notas e de agasallos para os/as docentes e houbo unha pequena actuación musical con voz e guitarra a cargo dun alumno e unha alumna de 4º de ESO, compoñentes do grupo Bandoviño.

Paralelamente ás actividades complementarias organizadas a nivel de centro, os/as coordinadores/as e xefes/as dos diferentes ciclos e departamentos organizaron unha serie de excursións, saídas e actividades de grupo, que foron as seguintes durante este trimestre:

- No 1º ciclo de EP, realizáronse as seguintes actividades:

Asistencia ao espectáculo do contacontos Boniface Ofogo na Casa da Cultura de Valdoviño.

Teatro en inglés na Casa da Cultura de Valdoviño.

Excursión á Granxa Escola do Bellelle.

Visitas á Casa da Cultura de Valdoviño para ver distintas exposicións (Picasso, 50 Aniversario...)

Charla da Confraría de Cedeira e de mariscadoras de Valdoviño sobre a contaminación dos plásticos nos mares e nas praias da contorna.



Animación á lectura de Santillana na biblioteca do centro.

Asistencia ás representacións teatrais dos grupos do centro participantes en Teatro con G, na Casa da Cultura de Valdoviño.

- No 2º ciclo de EP, o 4º curso realizou unha excursión a Viveiro o 9 de xuño para coñecer o río Landro, dentro do proxecto “Ríos” que se está a desenvolver no centro, e os eucaliptos máis grandes de Europa. Tamén levou a cabo unha saída á praia de Vilarrube para realizar unha actividade de iniciación ao surf o xoves 25 de maio.
- No 3º ciclo de EP, leváronse a cabo as seguintes actividades:

Participación dos grupos de 6º curso no festival Teatro con G organizado pola Coordinadora de Equipas de Normalización Lingüística de Ferrolterra, con tres obras (unha por clase) que representaron para o público asistente en dito festival, entre o cal estiveron tamén os grupos de 5º curso. Esta actividade tivo lugar o 6 de xuño, pero previamente, o día 5, representaron as súas obras para o resto do alumnado de EP no auditorio da Casa da Cultura de Valdoviño.

Excursión a Galipark Multiaventura, en Padrón, o 14 de xuño.

Excursión ao Aquapark de Cerceda o 15 de xuño.

Saída á praia da Frouxeira o 20 de xuño.

- En canto á ESO, realizáronse as seguintes saídas e actividades:
 - O Departamento de Educación Física levou a cabo as seguintes actividades:
 - Excursión a Asturias para realizar actividades de multiaventura con 1º de ESO do 26 ao 28 de abril.
 - Saídas ao medio natural próximo ao centro con todo o alumnado no mes de maio.
 - Bautismos de surf con 4º de EP o 25 de maio.
 - Obradoiro sobre protección solar para 1º de ESO o 8 de xuño.
 - Torneo de fútbol ao longo do trimestre, cuxas finais tiveron lugar o 15 de xuño.
 - Bautismos de surf con 1º de ESO o 20 de xuño.
 - Rafting no río Miño para 3º e 4º de ESO o 23 de xuño.
 - O Departamento de Física e Química organizou unha saída o luns 22 de maio para visitar o centro de investigación CICA (Centro Interdisciplinar de Química e Bioloxía) asociado á Universidade da Coruña. Neste centro, o grupo Nanoself amosoulle ao alumnado o seu traballo relacionado coa química supramolecular, a química biolóxica e a nanotecnoloxía. O grupo Exprela explicoulle os seus proxectos de xenética orientada á biomedicina. Tamén visitaron o grupo Aquaterra: un grupo interdisciplinar de científicos e enxeñeiros que traballan na xestión sostible dos recursos hídricos e do chan.
 - O Departamento de Orientación levou a cabo unha serie de charlas para o alumnado da ESO durante o mes de xuño: sobre drogodependencia, a través da asociación ASFEDRO, os días 13 e 14 de xuño, e sobre a diversidade LGTBI o día 19 de xuño.
 - O Departamento de Xeografía e Historia organizou as seguintes actividades:



Charla de Arqueoloxía co alumnado de 1º de ESO o martes 28 de abril a cargo da arqueóloga Vanesa Trevín Pita explicando as súas experiencias no campo no que traballa.

Saída a Lugo co alumnado de 1º de ESO, Cultura Clásica e Latín, o xoves 4 de maio, incluíndo a visita ao Castro de Viladonga e á cidade de Lugo, guiada por un guía profesional para ver os restos romanos da cidade.

Saída á Capela co alumnado de 4º de ESO, que visitou o Museo Etnográfico da Capela e realizou unha ruta polas Fragas do Eume guiada polo profesor do departamento Juan Coira Pociña.

Saída a Compostela co alumnado de 2º e 3º de ESO, que consistiu na visita á cidade de Compostela e á catedral por parte do alumnado de 2º da ESO, con actividades guiadas polo profesor Juan Coira Pociña, e na visita á cidade e ao Parlamento de Galicia por parte do alumnado de 3º de ESO, con actividades guiadas pola profesora Vanessa Pita Santalla.

- Ademais, o alumnado de 4º de ESO realizou a súa excursión de fin de estudos a Tenerife a mediados do mes de abril e unha saída ao Aquapark de Cerceda o 20 de xuño, como despedida do centro.

Finalmente, trasladouse aos diferentes ciclos e departamentos toda aquela información recibida no centro referida a distintos tipos de actividades que puideran ser do interese do profesorado. Esta información chegou vía correo electrónico ou correo ordinario. A información que chega en papel sobre estas actividades ou sobre a participación en diferentes concursos artísticos e literarios estase a colocar nunhas bandexas habilitadas para tal efecto na sala do profesorado.

Puntos fortes:

Fundamentalmente, a implicación de toda a comunidade educativa nas actividades, festivais e distintas celebracións. Á hora de levar a cabo ditas actividades, hai unha correcta distribución de tarefas e, cada curso, ben sexa de Infantil, de Primaria ou de Secundaria, se implica intensamente nos aspectos que lle corresponde preparar en cada momento. Valoramos tamén moi positivamente, polo que nos parece un punto forte importante, a interrelación entre o EACE, o EDLG e a Biblioteca, que estes últimos cursos está a ser aínda máis estreita do que xa era en anos anteriores e que nos permite xuntar forzas para facer cousas en común máis produtivas e eficientes. Por outra banda, a creación de comisións específicas para levar a cabo o desenvolvemento da celebración do 50 aniversario do centro redonda nesa boa disposición de toda a comunidade educativa á hora de traballar xuntos nun proxecto común e de tan grande envergadura como este.

Puntos débiles:

Poucos puntos débiles podemos mencionar, xa que retomar as actividades e poder desenvolverlas todos/as xuntos/as, como se facía antes da pandemia, axudou a motivar os membros da comunidade educativa, que se involucraron notablemente no desenvolvemento das actividades complementarias e extraescolares. O único punto débil do que podemos falar, coma sempre, é da falta de tempo para realizar certas propostas, especialmente na ESO, onde unha hora de titoría á semana non é suficiente para preparar moitos dos proxectos e non sempre é fácil encaixalos dentro das materias, as cales, á súa vez, tamén están xustas de horas lectivas para poder desenvolver todo o seu currículo.



Propostas de mellora:

Tentaremos seguir na mesma liña de traballo: en equipo, colaborando entre as distintas dinamizacións e implicando nas actividades do centro a todos os integrantes da comunidade educativa, xa que este método está a funcionar con éxito e as planificacións iniciais conseguen levarse a cabo na práctica totalidade das mesmas.

Valdoviño, 28 de xuño de 2023

María Lúsa Pita Rubido

Coordinadora do Equipo de Actividades
Complementarias e Extraescolares